

Judihomi Utipiho

Kimandi Judihomi Utipimandapi Nesipihande

Kimandi utipimandi Judiho jipatipiyahandisi ko piwiha komiha windi jipatimaise. Iyataahandi kandi Matiyuhomi piwiha usaaha 13:55 haatihuni ami Maakihomi piwiha usaaha 6:3 haatihuni ahotisihaapi isihiya mmoniwi gwinyaawaawi Judimo kimo Jisaasihomi saingiho Mariyaahaatami mwaahoe tiwi gwinyaawaayopo. Isi sandapi ko Jisaasihomi saingiho ipotihore. Komi utipihandi ipotihandaatihapi Pitaaho isihiya asireti asiwa katiwunjohiwaiwaapi katati ahiyataise. Aihi ami Judihoaisangi piwiha naasikaapi gwinyaataati utipiho kimo jipatipiyahore. Isi naasikura kimandi utipimandi jipatipiyahande. Sura jipatipaisura kinaungwiha 66-67 A.D. hura utipimandi kimandi jipatipiyahande.

Kima Piwima Judiho Utipiho Jipatipiya Niwusoaaasisawihiyai Gaahuraare Undindahandapihaare

¹Nini Judihonini Jisasi Kiraisihomi otipipatihonine. Aindi nini Jemisihomi saingihonine. Sahi Kiraisihomi isihyaati Autaahaatiho komihyaatimatitaatiwi aimi gaatati nasamaati ami ko nyami Apiho Autaahaatiho maariho nasamihi ami Jisasi Kiraisiho jainjatisawihyaatapi utipiho kimo jipatipaindi nusoasataayo. ²Nini sapi gaapundataayo Autaahaatiho sangi gaahati kasisati jatatananati jainjatitendo. Iyati ami ko sangi sami maariho omanjititih bipi yatihisititandihandi nasamitendo. Nasanyonih ami sahi isihiyaisi maariho numwitaatiwihandi waati waati anyaapi kaitaatiwo.

Isihiya Maipihya Autaahaatihomi Piwihai Nepi Ipihatiwimaitaatiwihiya Kiraisihomi Isihiyaamihatih Nasohitihandapihaare

³Nisi naisihyaati Kiraisihopi nisataiwi giwunyaahohiyihyaate, Nini jih pihindi gwinyaati waati maaritataayo Autaahaatiho nyangi japihi nanyamaitandi otipipati kaindihandapi utipiho sapi jipatipaitondo. Jih saindihoninisi wani nini anditisaiti utipiho saindi jipatipiyataayo. Sahi kopi giwunyaahohiyihyaatangi giwunyaitaatiwihandi Autaahaatiho

nasamindihandi sahi windi namaamapi anitiwi isiwatiwise. Anitiwi isiwatiwi piwiha jaipipa ami piwiha nehihapa nasonihi kapai nemapise. ⁴Sandi apaapimaato, isihiya saiwihiya piwiha nehaha jaiwitih katiwunjohiyihyaapi aimehura Autaahaatiho satati katise. Isihiya saiwihiyai Autaahaatiho neti piwihetemahonihi kiya piwiha nepi owetitaapo, tati katisawihya aimi noaatiwi sahi Kiraisihopi giwunyaahohiyihyaatamihatih nasopo. Isiya siya Autaahaatihoai ahosumwapihyaare. Aiwi ami kiya Autaahaatiho nehi ko sawahometirihiretapi isihiyai kiya wapa kamaiwi nehihandi gaahandi kawindihandi nepi kiyaami maipihapa ainjotahapetemapi apipaahi maipihapa usihiya asihya ambipati naminiwi timaamaipi kiyawaayopo. Aiwi nyami Awaisiho Jisasi Kiraisiho nyangi nyainjatisihoai pohipiwiwi ahosumwapihyaare.

⁵Jihura Awaisiho kaiwaiwaapi sahi aimi mmoniwi nasesipatahiyaate. Mmoniwihiyaatitihandi kandi sahi kaiwaapi japihi gwinyaitaatiwi nini sangi kasatataato. Jihura Isiraherihyai Autaahaatiho japihi numwaati numwaasi yandihiwati naihi Isipihandi namasi nowaayopo. Aihhi ami kiyaami usaisi ipotihura Autaahaatiho tiwati nemataise, kopi windi baiwi gimaawunyaahohiyihyai. ⁶Ami sahi aimi mmoniwi gwinyaapihiyaate, Autaahaatiho komi otipipatihiya yamihapataatihapihiyai kawindihandapo. Siya otipipatihiya enjerihyai Autaahaatiho otipipati nunyati ahiwisataise. Nunyati ahiwihi kati kaiwi baiwi kataatih bimimopo. Kiya sawanaami maatimaatihiraahi kati kiyaami otipipatisuni ami bimohipipihuni namawaayopo. Aihhi ami sandapi Autaahaatiho kiyaisi ipipihaiwa senihandi apipaahi watipihaiwa nasisoari ahotitandihaiwaara wisasati napusihi wapihi apipaahi aungwohandi asihatahapihi napundawaayopo. Sapihi apipaahi asihatimbipihhi napundawa jatawaayopo, Autaahaatihomi asisiha awaisiha Jisaasiho japihi nasonihura kiya piwiha naitaatiwo. ⁷Aihhi ami isihiya aunahipihauri Sotomihandaahuni Gomoraahandaahuni ami aunahipihaiwa kaurami deti ahetiwaiwaaraahiyauni Autaahaatihomi otipipatihiya yamihapataatihapihiyaamataiwi naasikati kiyawaayopo. Kiya maipihaiwa pihitiwi kaiwi ami ambipati timaamaitohiwaiwaami wiwa apipaahi ainjotati titihimetahaiwa kiyawaayopo. Saiwi kiya kiyauhi Autaahaatiho kaiwaapundati sisiha namaayotati kaanihi tihisiha nusoasihhi noti tihati kiyaisinihi owemataise.

Isi saiwa jihura siyati Autaahaatiho kaiwimaiwa isihiya maipihaiwa napaitiwi kiyohiyihya Autaahaatiho siyahoso, tiwi mmoniwi yaitaatiwi kiyataise. ⁸Aihhi ami isihiya siya naasikati kaiwi yapepati kihaiwa kihaiwa mmoniwi Autaahaatiho nyangi wapa yapepata nanyisihe, tiwi nepi maipihaiwa kaiwi kiya sawanaami ambipatisi nepi nosasawaayopo. Aiwi ami kiya Autaahaatihomi watipihandisi ahosumapo. Aiwi

ami kiya Autaahaatihomi otipipatihya apipaahi gaahiya jhiya yamihapataatiji bimohiyihyaapi maipihapa katiwi sisipitiwihyaare. ⁹Satiwi kiyaapi sisipihitauhihandi kandi ami Autaahaatihomi otipipatiho jiho awaisiho yamihapataatiji bimisihho Maikorihho Mosesihomi ambipatapi Bwaasirihirisami sanimi, nini naitaano nini naitaano, nimi itihinamaami sura ko yamihapataatihapi otipipatiho enjerihho Bwaasirihiri maipiha kaundati itihimundise, owetise. Ko Bwaasirihiri nehi saundataase. “Awaisiho gisi itihitati kinyi windi piwaamaatipi bipi namihaape,” hititaise undataase. ¹⁰Iyataati ami isiya siya kahapaamapipa kiya moniwi ami namusesipatahapaapi maipihaiwa katiwi apipaahi sisipitiwihyaare. Iyataati ami siya kohasipihho gwinyaitandihandi owehapaamataiwihyaare. Kiyaari nehi kiyaami ambipatami maaritindihandami watipihandaatiji bindawa usihya asihya ambipati naminiwi timaamaitohirihireti japepihirihyaare. Saiwi kiya kiyohitimandi kandaahi sawanaisi neti daahi nusopisasataise. ¹¹Ese! Isihya siya apipaahi naanjihandi yaawihandi awaindihandi nepi napwitaapo, jihura Kenihho kaimumwaaŋi kiyawaayowo. Aiwi ami kiya Baaramihomatawi nawihho naitaatiwihandapi waati gwinyaapihyaare. Aiwi kiya nawihho naitaatiwihapa wapa kaitaatiwi waati gwinyaapihyaare. Aiwi ami kiya Koraahomatawi Autaahaatihoai pohipiwiwi ahosumwapihyaare. Isi ko Koraaho nosasinati owetipatamatawi naasikati kaiwi nosasiniwi owetitaapo.

¹²Nahateweti sahi Autaahaatihomi isihyaisawi ahoyaniwi nandapa tihwi naniwi sahi maariho naminihohitihandi ususaati nepi ausaapi nasoaniwi bimohipipihhi kiya napiwi Autaahaatihomi ndiheti maipihaiwa ainjotahaiwa kaiwihyaare. Aiwi ami kiya nehi sawanaapaahihhi gwinyapeniwi nandapa awaimbipa isihya tihwi nanihohipipihamatawi mamaawisawiya nandapa naniwihyaare. Saiwiya siya tiwipati ikwaatipihati wipati owehati mbipa tiwihaati nemasipatamataiwihyaare. Aiwi ami kiya ipati kati yandipihho ningoaitandihuraatihihandi kandi yandipihho namingosipatamataiwihyaare. Iyataati ami isiya siya ipati tambatihiri damipatisawi nawopi yotauhi apipaahi awaipitamasipatamataiwihyaasi kiya yataira kiyaanihi napwitaapo.

¹³Aiwi ami kiya durihiri nonasayati waati tiwayaati sisipati ahaipatamatawi maipihaiwa mamaawisawiya autaahinjaawi auta kaiwihyaare. Aiwi ami kiya kaumbwaati titihi kaatami daihira yamihapataatiji biyati namoti asihhi naipatamataiwihyaare. Kiya saiwa kiyohiwimaiwaapi Autaahaatiho aunahipati apipaahi asahatati apipaahi maipihati kiyaapi gwinyaati ahiyataise, kiya nuwi kata ambipati maariho apipaahi yaawihandi kiyaanihi nasisoari newaatitaatiwo.

¹⁴⁻¹⁵Enokiho so Adaamihooapihapi namoyaatiimi napiwi ko ikwihihitirihhi wihinirami yahuraapihi noaipasihore. Isi ko isihya siya

maipihiyai kiyaamiheti nusoaipaitandihandapī Autaahaatiho koai neti nunjihi satati katise: “Nini Awaisihoai iwijnjataayo ko komi otipipatihiya yamihapataatihi bimohiyihiya taahiyihiya ambipati owehandisati maasi napihī isihiya siya Autaahaatihoai ahosumwapi maipihaiwa kaiwi, ami Autaahaatihopī maipihaiwa katiwi sisipitohiyihiyai sahi saiwi saiwihiyaate, undati neti piwihetematī kiyaisi yaawati naanjhandi wihoaanjhandi numwitando.” tise. ¹⁶ Aiwi ami kiya Autaahaatihopuni ami isihiya usaapuni kiyai nusoaipasiwaiwaapi itihitiwihiyaare. Aiwi ami kiya kiyaami ambipati maariho maaritati windosihī gwinyaahohirihireti japepihiriwi kaiwihiyaare. Aiwi ami kiya maahomwaanji tipipapi konyahitiwi iwiriwi piwaatiwi nyahi gaahyaaniso, tiwi sawana naimaatiniwihiyaare. Aiwi ami kiya isihiyaisi piwiha gaaha jipiyaha kaundiwihiyaare, kiya kiyai niwupwaasahi kiyaami gwinyaapi maaritohipipa kaitaatiwo.

Kima Piwima Kiraisihomi Isihiya Baiwi Bimitaatiwihiretapihaare

¹⁷ Iyataati ami sahihi sahi Kiraisihopī giwunyaahohiyihiyaati nisi naisihyaate, ipoti wiwa noaipaitandihaiwaapi Jisaasihomī otipipatihiya komi piwiha otipipati nunyati natausaasisawihiya kasatohiha sahi japihi gwinyaapise. ¹⁸ Kiya Jisaasihomī otipipatihiya aposerihya ko kaiwaiwa mmoniwi nepi kaiwi nuwipinjohiyihiya sangisi satiwi kasatopo. “Asisiha ipotihaiweti isihiya sangi sisipisatitaatiwihiya noaipaitaapo,” satopo. Siya isiya Autaahaatihoai ahosumwapi nehi titihi kiya gwinyaahohirihireti japepihiriwi kaiwihiyaare. ¹⁹ Iyataati ami isiya siya Autaahaatihomī isihiya maasi timaamaitotihandi nepi yiyandihemapi tipitapaahaariwihiyaare. Iyataati isiya siya Autaahaatihomī Itipihō Gaaho apipaahi owehiya titihi kiya sawanaami gwinyaapi maaritohirihireti kaiwi bitotawaahiyaare.

²⁰ Kiya taawi saisaihi ami sahi nisi naisihyaati Kiraisihopī giwunyaahohiyihiyaate, sahi kopī giwunyaahohitihandi waati waati watipitati noaipane. Aiwi ami sahi Autaahaatihomī Itipihō Gaaho neti gisunyaati anditisaihonihiireti ami Itipihō koraahi gaapundiwise. ²¹ Aiwi ami sahi saiwi mmoniwise, Autaahaatiho nyangi maariho nanyinyataise tiwo. Aiwi sahi Autaahaatiho sangi maariho nasamindihandaatihi nandaapī katihi bimaawise ami sangi ko maariho nasamito. Aiwi sahi nyami Awaisiho Jisasi Kiraisiho nasati sangi gaahati kasisati jatatananati maariho nasanyati, ami sahi asitimatitaatiwihandi nasamita jatiwise. Nasanyonihi nepi sahi asiyihyaatimatiwi kiyaatinihi bimitaatiwo. ²² Aiwi ami isihiya Kiraisihopī nehi masihonji giwunyaapi windi anditimitiwi, ami maariho yiyahwi gwinyaapi nitanohiyihiyai sahi maariho asipiwiwi anditiwipise. ²³ Iyataati ami isihiya usa aimi sisihaapihi nuwi tihoatitaahetawaayopo. Isi kiyai sahi sisihaambi aipi japihi nepise. Nepi

sahi kiyai saundiwi, maipihaiwa kamaiwi japihi napiwise, undiwi keti japihi numwaapise. Iyawaawi ami isihiya usaisi sahi maariho nunyawu ami gaahati kawiwise. Saiwi gaahati kawisawaahandi kandi ami kiyaami maipihaiwaapi sahi sawanaati jatiniwo. Kiyaami maipihaiwa ainjotati titihimetahaiwa kiyaamiheti noti namanati watipitahiyaasi kaiwa sangi nasamwaitaisi sahi kaiwaapi yaiwi kaiwai ahosumwapise.

Nyahi Autaahaatihoai Gaahoge Undaati Mepi Autaahemwaitihaawo

²⁴Autahaatiho nyangi japihi nanyamaasihoai nyahi mepi autaahemwaitihaawo. Ko sangi biyati jatatamanati jainjatonihahi sahi Kiraisihopi giwunyaahohitihandi windi namapi timaamihaitaapo. Ami ko sangi komi nausainjitihandi gaahandaatihi nasamaasi niyonihi komi ndiheti maipihaiwa owehiyaati ainahiyihyaati awaindihandi maarititaapo. ²⁵Iyataati Autahaatiho nehi naasohihi so bindataise. Bindataati nyami Awaisiho Jisasi Kiraisihomi otipipataahi nyangi japihi nanyamaasihoe. Nyangi ko japihi nanyamaasihoai nyahi mepi autaahemwaitihaawo. Ko Jihahi Awaisihoematati bimoti ami ko watipihaiwa nahatewaisahosi ami ko jihahi awaisiho mitihoematati nahatewai jatane. Iyataati saiwa komi watipihaiwa nahatewaisa aimehuraapi bimaami nasati ami wani kimuraisangi bimoti ami ipotisangi jinjapihi konihi bimaami nutaise. Akite.